

Nkolo ajali kobeleva. Bomitungisa mpo na likambo moko te nde kati na makambo yonso tika ete bisengeli na bino biyebana epai na Njambe na mabondeli mpe na malombo mpe na matondi. Mpe kimia na Njambe oyo eleki makanisi yonso ekosenjela mitema na bino mpe bikaniselo na bino kati na Klisto Yesu.

(Bafilipi 4:6,7)

Kojipola maloba na yo ekopesa pole. (Njembo 119:130)

Mpe ete longwa na bomwana na yo, osili koyeba Makomi na bulee, makoki kopesa yo boyebi mpo na kobika na njela na kondima kati na Klisto Yesu.

(2 Timote 3:15)

Ekomami ete, Moto akobika bobele na kwanga te nde na maloba yonso makobimaka na monoko na Njambe.

(Matai 4:4)

Ndako na bayengebeni ejali koteleva. (Masese 12:7)

Nkolo Yesu alobaki ete, Moto na moto oyo akoyokaka maloba na ngai mpe akotosaka yango akokokana na moto na mayele oyo atongi ndako na ye likolo na mabanga. Mbula enoki mpe mpela eyei mpe mipepe mipepi mpe ibeti ndako yango nde ekwei te, jambi etongami likolo na libanga.

(Matai 7:24,25)

Mpo ete moto akoki kotia moboko mosusu te bobele yango esili kotongama, yango Yesu Klisto.

(1 Bakolinti 3:11)

Lobiko mpe ejali na moto mosusu te, mpo ete nkombo mosusu te esili koposama awa na nse kati na bato ete tokoka kobika mpo na yango.

(Misala 4:12)

Mokili ejali mpe kolongwa mpe mposa mabe na yango lokola, nde ye oyo akosalaka mokano na Njambe akoumelaka seko.


(1 Yoane 2:17)

© C.E.R.S. - B.P. 1673 Kananga

République Démocratique Du Congo

Email: 33eme.cers.lit@gmail.com

<http://www.33eme-cers.org/>



Njambe asalaki libota na liboso

Yawe Njambe alobaki ete, Ejali malamumu te ete moto ajala ye moko. Nakosalela ye mosungi mobongi na ye. Bongo Yawe Njambe alalisaki moto mpongi makasi, mpe elalaki ye alongolaki mokwa moko na mopanji na ye, mpe ajipaki esika yango na mosuni. Yawe Njambe ajalisaki mwasi na mokwa molongolaki ye na moto, mpe ayaki na ye epai na moto. Yango wana moto akotika tata na ye mpe mama na ye mpe akosangana na mwasi na ye, mpe bango bakojala mosuni moko. (Genese 2:18,21,22,24)

(Njambe apesaki Adama mwasi na ye Ewa, lokola moombo te, mpe lisusu lokola mosali te, kasi Njambe asalaki mobali mpe mwasi mpo ete balingana mpe mpo ete basalisana !)

Njambe apesaki mitindu ntina ete, libota etambola malamumu

Bino mibali... bojalana na basi na bino kososola na mayele ete bango baleki motau, nde bopesa lokumu epai na bango lokola. Bosalelaka bango makambo na makasi te. Bino babali, bolingaka basi na bino pelamoko Klisto alingaki Lingomba mpe amipesaki ye moko mpo na bango.

(1 Petelo 3:7; Bakolose 3:19; Baefese 5:25)

Bobeles bongo bino basi, botosa babali na bino ete, ata bamosusu na bango bandimi Liloba te, bajuama na kimia mpe na bijaleli malamumu na basi na bango, wana esili bango kotala bijaleli na bino bijali na mpeto mpe na limemi.

(1 Petelo 3:1,2)

Bokola mwana na njela ekoki na ye kotambola; ekokoma ye monene akopengwa na yango te. Kasi mwana oyo atikami epai na ye moko akokomisa mama na ye na nsoni.

(Masese 22:6, 29:15)

Libala ejali mpo na seko na miso na Njambe

Tika ete libala likumisama kati na bato yonso. Mokano na Njambe ejali boye ete bobulisama ete botika makambo na pite. Moto na moto ayebea kojua mwasi na ye moko kati na bulee mpe na litosi.

(Baebele 13:4; 1 Batesaloniki 4:3,4)

Nkolo Yesu alobaki ete: Botangi te ete ye oyo asalaki bango longwa na ebandeli, asalaki bango mobali mpe mwasi? Alobi mpe ete, Mpo na ntina oyo, moto akotika tata na ye mpe mama na ye mpe akosangana na mwasi na ye mpe bango mibale bakojala njoto moko. Bongo bajali lisusu mibale te kasi njoto moko. Oyo nde Njambe asili kotonga, tika te ete moto akangola yango.

(Matai 19:4-6)

Bomama eloko na mbindo te. (2 Bakolinti 6:17)

Soko moto apengwi epai na bato na kosolola milimo mpe na banganga na nkisi, mpo na kokumisa bango, mbe ngai nakotia nkanda na ngai epai na moto yango, mpe nakolongola ye na kati na bato na ye.

(Lewitiko 20:6)

Moto akojuama kati na bino te, oyo akojikisa mwana mobali na ye to mwana mwasi na ye lokola mbeka, to moto na jonga, to moto na kotala mioto mpo na kosakola liboso, to moto na kosala nkisi mpo na kosakola liboso, to nganga na nkisi, to molengoli, to moto na kobianga milimo, to nganga na soloka, to moto na kosolola na bakufi. Mpo ete bato yonso na kosala makambo oyo bajali mbindo na miso na Yawe ... Yawe Njambe na yo andimi ete osala boye te.

(Dutelonome 18:10-14)

Yango wana, bobima na kati na bango, mpe bokabwana na bango. Njambe alobi bongo. Bomama eloko na mbindo te, mpe boye nakoyamba bino. Nakojala tata epai na bino, mpe bino bakojala bana na ngai babali mpe bana na ngai basi. Nkolo-na-Nguya-Yonso alobi bongo.

(2 Bakolinti 6:17,18)

Nkolo Yesu alongaki Satana

Yoane akomelaki libota na Njambe ete: Bana, bino bojali bato na Njambe mpe bosili koleka bango mpo ete ye oyo ajali kati na bino aleki oyo ajali kati na mokili. Nani moleki na mokili? Bobele ye oyo andimi ete Yesu ajali Mwana na Njambe.

(1 Yoane 4:4, 5:5)

Nkolo Yesu alobaki ete, Kati na mokili bojali na boloji; nde boyika mpiko, ngai nasili koleka mokili.

(Yoane 16:33)

Masanga ya makasi ekobomaka mabota mingi

Vinyo ejali motuki mpe masanga ekongala; ye oyo akojimbisama na yango ajangi mayele. Banani na mpasi? Banani na mawa? Banani na kowelana? Banani na koimaima? Banani na mpota na mpamba? Banani na miso motane? Baoyo bakoumelaka komela masanga, baoyo bakokenda komekaka vinyo esanganisami ndenge na ndenge ... Na nsuka ekokata lokola nyoka, ekojokisa lokola etupa. Miso na yo ikomonamona makambo na kokamwa, mpe motema na yo ekobimisa bilobaloba.

(Masese 20:1, 23:29-33)

Mwana na ngai, yoka mpe jala na boyebi mpe kamba motema na yo na njela. Jala elongo na bameli na masanga te, soko elongo na bato te baoyo bakoliaka mosuni na mposa mabe. Jambi kolanga mpe koliaka mingi mingi ekokomisa moto na bobola; goigoi ekolatisa mpe moto bilamba bipaswani.

(Masese 23:19-21)

Kosokema mpe kotosa Yawe ejali njela na bojui mpe lokumu mpe bomoi.

(Masese 22:4)

Bobelema epai na Njambe mpe ye akobelema epai na bino. (Yakobo 4:8)

Kasi mpo na ngai, ejali malamumu ete nabelema na Njambe, nasili kotia elikia na ngai kati na Nkolo Yawe, ete nasoola misala na yo yonso.

(Njembo 73:28)